

12417
Ein vralte Practica/ die
nicht fehlen/ noch nemandt betriegen wirt/
Auff das M. D. XLVIII. Vnd alle andere Jar/
bis zum ende der welt / auß Gottes ewigem
vnd warhafftigem wort / hezt auff's
new zusamen gelesen / durch
Gasparem Bruschiu.

Der ainige Herz dises vnd aller Jar/
bis zum end der welt / Gott Vatter/
Sun/ vnd hailiger Geist.

Deuteronomij 30.

Jch neme himel vnd Erden heit über euch zu zeltigen/
Jch hab euch leben vnd tod / Segen vnd fluch fürgelegt/
das du das leben erwolest/ Vnd du vnd dein sas
men leben mögest/ das jr den Herren
ewern Gott liebet/ vnd
seiner stift ges
horchet.

Die letzte zeit ist vor der thür /
Vnd wirdt komen der Richter schir.
Der alle ding wirdt machen schlecht /
Nemen zu sich all seine knecht.
Den Sathan aber vnd sein gkind /
Welchs bliben ist stock vnd star blind.
Wirdt stossen er ins hellisch feür /
Da freud vnd wunn wirt sein gar theür.
Drumb lasset vns nun heben auff /
Die Hetspter vnd wol sehen drauff.
Das wir ja nicht versäumen den /
Der vns erlözt von aller peit.
Ach lazt vns in empfangen wol /
Der vnser König werden sol.
Vnd bleiben auch Allmächtigait /
Von nun an bis in ewigkait.
Wer disen frölich sehen will /
Der sehe vnd treff das recht zil.
Fürcht vnd ehr Gott von hertzen rain /
Der istz der ghört in Gottes gmain.
Dauon würdstu in diesem büch /
Mehr finden drumb dus trewlich süch.
Denn es ist nicht ain menschlich ticht /
Gotts wort ist vnserer füßen licht.
Die ewig prinnende Lucern /
Dem nach wir vns solln richten gern.



Den Fürsichtigen/ Ersamen vnd Weisen
Herren Johann Bodmar/ vnd Johann Nagel/
Burgermeistern/ vnd dem ganzen Rathe/
der Kayserlichen Keychs Statt
Lindaw/ Meinen gebie-
tenden günstigen
lieben Her-
ren.

Gnad vnd Frid durch Jesum
Christum Amen.

S Vrsichtige/ Ersamen/ Weiß/ gebietend günstig
Herren/ Es ist ain zeylang her gewesen/ vnd ist noch allent-
halb der brauch/ yezund inn aller welt/ das/ wer nur ain we-
nig sich dunckt ainen verstand haben der Astrologien/ der macht vnd
schreibt ain Practicam/ der leichtfertigen abergläubigen welt damit
zudienen/ die als bald jr Maul/ Nasen/ vnd Augen darein steckt/ vnd
darauß allain rhat slichet/ vngeacht Gottes worts/ vnd seiner hertzi-
chen leeren vnd befehl/ die vns alle tag fürgepredigt vnd verkündigt
werden/ nach denen allain wir vnns vnd vnser ganzes leben richten
soltten. Vnd ist eben diser brauch/ laider auch bey vnd neben dem schei-
nenden liecht Göttlichen worts (welches vnns solches weißsagen vnd
Sterndeuten auff das höchst verhelit) so gewaltig eingewurzelt/ vnd
blendet/ bezaubert/ vnd bethört der laidige Teüfel/ mit solchen seinen
Finsternussen dermassen die ganze welt/ das Practicken schreiben/ le-
sen/ vnd rhatfragen/ niemandt für sünd hellet/ welches doch der aller
höchsten vnd gewlichsten sünden aine ist/ dawider der ewig Allmäch-
tig Gott selbst von dem himel schreyet/ vnd als der rechte Eyserer mit
schrecklichen worten prediget vnd tröwet / Leuitici am 20. Capitel/
da er sagt / Er wölle sein angesicht wider solche Warsager vnd Zei-
chendeüter setzen/ vnd sy auß irem volck außreytten/ dieweyle dann so
ain gemainer brauch worden ist/ Practicken zuschreiben/ hab ich mich
dismals auch vnderwunden / ain Practica zusammen zulesen/ doch nit
ain Abgöttische vnd Gottlose (dergleichen vnser Astrologi auß Pro-
tomeo/ Julio Firmico/ Albumasere/ Hali/ Hermete/ vnd andern zusä-

men bringen/ welches Hayden geweest/ vnd den warhafftigen Gott
nye erkandt haben) Sonder ain Gottsälige vnd Christliche/ auß dem
gnadenreichen schatz des ewigen Höllichen worts/ darauß allain wir
Christen vnser glück vnd wolfart suchen vnd holen sollen/ Auß diser
yetzmalis meiner Practica/ wirt vnd soll meniglich sehen vnd lernen/
das man gñte glücksälige jar/ vñ allerlay seggen/ nicht auß des himels
lauff/ oder der Sternen Influentz/ sonder vom ewigen Allmächtigen
Gott/ vnserm ainigen Schöpffer/ vatter vnd Herzen allain gewärtig
sey/ such/ bitt vnd beger/ Dise mein arbeit an jm selbs gering/ wayß
ich niemandt billicher zuschencken vnd zü dedicieren/ dann E. E. W.
in dero loblichen Statt ichs auß Gottes wort züsamē gelesen/ vnd in
dise ordnung/ Practick weiß/ gebracht hab/ Ist derwegen an E. E. W.
mein vnderthänig bitt/ E. E. W. wöllen jnen solche arbeit vnd vnder-
thenige wolmainung/ günstiglich vnd wol gefallen lassen/ vnd diß
mals mit solllicher (souil mein arbeit belanger) geringer Dedication
für willen nemen / biß dermal ains was wichtigeres hernach volge/
Wiewol wir nichts wichtigeres vnd höhers haben/ des wir mehr bes-
dörffen/ vnd an dem vns mehr gelegen ist/ dann Gottes wort/ darauß
(wie oben angezaigt) auch dise ganze Practica geflossen vnd genom-
men ist/ Vñ seytemal die ewige weyßheit Esate am 55. Ca. selbs sagt/
Sein wort soll nit lehr zü jm kömen/ sonder das jhenig thun vnd auß-
richten/ darumb ers außgesandt hatt/ So hoffe ich auch zü Gott/ dise
Practica auß nichten anderst/ dann Gottes wort gezogen/ werde recht
schaffne Gottsforcht vnd liebe der gebott Gottes würcken vnd erwe-
cken/ bey vilen leüten / die die ganzen Bibel nit vermügen zü auffen/
auch solche ernstliche tröwungen in predigen selten hören/ nach dems
laider schier dahin gerhaten/ das man auf der Cantzel mehr gnad/ dan
Gottes zorn/ mehr Euangelion/ dann Esatz prediget/ da billich in dis-
ser vnbüßfertigen welt das widerspyl geschehen solt / Was aber die
andern Abgöttische Practicken vnrhats schaffen/ anrichten/ vnd ans-
gericht haben/ wüßte ich auch wol zusagen/ will es aber weisen leüten
zü bedencken befelhen/ Das loblich Herzogthumb Gölch hat es wol
gefület/ wie jm das glück/ welches jm ain Astrologus/ Salomon ge-
nandt/ in seiner Practick über das vier vñ vierzigst jar verhaissen/ auß-
geschlagen hat vnd erschossen ist/ wie es auch die Thüringischen Pra-
ctick schreiber vor ainem jar getroffen/ haben wir auch erfahren/ vnd wa-
es recht vnd Christenlich zügieng/ solten alle Practicken/ in allen Chris-
tenlichen Stetten vnd versamlungen auffgehoben werden/ vnd ver-
botten sein/ vnd vmb dises meines Judicij willen/ werden mir (meins
versehens) Gottsälige vnd rechtschaffne gelerte diser zeyt Philosophi

vnd Astronomi nicht seind sein/sonder solchen sachen selbst auch fernere nachdencken. Die Aberglaubigen vnd Abgöttischen Astrologos aber/ will ich hiemit treulich vnnnd Christenlich gewarnet haben/ sy wöllen sich wider diese Practick/auß Gottes wort geflossen/ vnd auff den starcken felsen Gotes worts gegründet/nicht fräuentlich legen/dan seytemals des/ewigs vn vüberwintlichs wort ist/vnder dem sich müssen biegen die stolzen Herzen/ wie Job am 9.sagt/ Werden sy hie wenig schaffen/ Sy wöllen sich aber vor dem ewigen Gott demütigen/ iren irthumb erkennen/vnd bekennen/ sich von der lügen vnnnd vnwissenshait/zur warhait vnd hailfamen verstand wenden/vnd Got vmb vergebung irer mit solchem Practick schreiben bissher getribnen sünden/bitten/des gnad vnd Barmhertzigkeit (wie Hieremias in seinem dritten Klaglied rhümet) alle tag new ist. Ob sy es aber verachten wöllen/vnd der öffentlichen warhait widerstand thün/vnd Gottes wort anderst deuten (wie sy dann zü schutz irer Abgötterey auch sprüch führen) so sehen sy drauff/ das sy die gnad vnnnd barmhertzigkeit (so wir durch Christum erlangt vnnnd ererbt haben) nicht verlieren/vnnnd also ainen stain über sich walcken/der widerumb auff vnd über ire heüpter herab falle/vnd sy zermalme/dann Gott laßt sich vnd sein wort nicht spotten/hat auch kain mensch ye an Gottes wort vil gewonnen/ oder sich hie vnderstanden/Ritter zu werden/der nit drob wer zü scheytern gangen/ **E. F. W.** aber wölle diese meine arbeit vnd mich/inn günstigem schutz vnd befelch haben. Geben in ewer Statt Lindaw an dem Bodensee/ am tag Michaelis/des Fünffzehnhundert vnd siben vnd vierzigsten Jars.

E. F. W.

Vnderthäniger
gehorsamer

Gaspar Brusch von
Bai. Maie. gekrönte-
ter Poet: ewer Schü-
len Rector.

An den Christlichen Leser.

Diese Practica vnnnd dises Almanach (Christenli-
cher lieber leser) wirdt vil ain andere art/ form vnnnd
gestalt haben/ dan deren Practicken vñ Kalender/ die
sich Astrologos/ das ist/ Stern seher vñ deüter nennen/ Dan
die Astrologischen Practick vnnnd Almanach schreiber/ geben
für/ vnd thün sich bey meniglichen des auß/ leücht fertigen/
vngotsfürsichtigen/ vnd abergleübigen leüten damit zü ho-
fieren/ vnd bey den ainfältigen damit ainen namen/ rhüm vñ
herlich ansehen zü bekömen/ wie sy allain vermög irer kunst
wissen vnd können auß der himlischen Körper/ Planeten vnd
Constellation bewegung/ derselben mancherlay züsamenfü-
gungen vnd Aspecten/ vnd anderer gestirn gelegenheit/ In-
fluentz vnd anzaigung/ dises zeitlichen vnd vergenglichen
lebens/ Tag/ Monat/ Jar/ vnd wie sich dieselben über aller-
lay sachen/ zü glück oder vnglück der menschen verlauffen
werden/ vnd sollen/ auff Prophetische weiß zü erklären/ vnd
anzüzaigen/ solcher mainungen (sag ich) soll dise mein Pra-
ctick keine haben/ sondern ich will dises mein warhafftigs vñ
ewigwerendes Almanach allain auß Gottes wort fürn/ wel-
ches allain die richtschnür vnser lebens/ vnser stab/ vnd wie
der Prophet David im 119. Psalm sagt/ Die brennende lampl
vnd leüchte vnser füß/ das ist alles vnser thüms vnd wans-
dels durch vnser ganzes leben auß/ sein sol/ vñ will das ganz
menschliche geschlecht/ auf nichte anders weisen oder laiten/
dann allain auff den/ vnd auff des willen vnd befelch/ der nit
allain der gestirn/ sonder alles deß (so im himel vnd erden ist)
ain gwoaltiger schöpffer/ Erbauer/ erhalter/ Administrator/
vnd Regent ist vnd sein wirt/ biß an das ende der welt/ vnd
von dem an biß in ewigkeit.

Vnd hie müß ich erstlich auß Gottes wort (denn für mein
Person will ich niemandt leßtern oder tadeln) denselben nach-
weisen Propheten vnnnd Astrologis sagen/ was für gefallen

Gott daran hab / das sy mit irem Rahten vnd Weyssagen /
die ganze welt (die Gott vnd Gottes wort allain hören / vnd
nach im allain sich richten solte) dermassen bethören / bezau-
bern vnd verführen / das yederman / vngeacht Gottes wort /
desselben harten tröwungen vñ freündlichen verhaissungē /
das maul nur inn die Kalender vnd Practicken stecket / vnd
darnach sich menigklich mit kauffen / verkauffen / mit Säen /
Pflanzen / vñ allem andern stracks nach den Practicken rich-
tet / Gottes aber vnd seines worts ganz vnd gar vergisset:
Welches vns nicht nach einfluss der gestirn / gütes oder böses
verhaisset vnd tröwet / sonder verhaisset vnd verspricht allen
in gemain (die Gottes wort lieben / hören vnd halten) alles
güts / narung / frid / gesundhait / schutz / wolfart / glück / hayl /
vnd sälligkeit: Tröwet aber aufs ernstlichest den verächtern
vnd übertretern alles vnglück vnd ewigs verderben / wenn
das gestirn vnd ire treüm / ire Zauberer vnd Practickschrey-
ber / inen noch so vil güts verkündigten vnd Propheceyten.
Nun wollen wir hören / was denselben sternguggeren vñ deü-
tern / vnd zwar allen denen so mit Zauberey / treümen / schwar-
zen künsten vnd dergleichen Teüfelswerck vmbgehn / Gott
selbs von himel predige.

Deuteronomij am xviii. Cap.

¶ Wan du inn das land kommest / das dir der Herr dein Gott
geben wirt / so solt du nicht lernen thun / die grewel diser völk-
er / das nit vnder dir gefunden werde / der seinen Sune oder
Tochter durchs feür gehn lasse / oder ain Warsager / oder ain
tagwöler / oder der auff vogel geschray achte / oder ain Zaube-
rer / oder beschwöler / oder warsager / oder Zaichendeüter / oder
der die todten frage / denn wer solches thut / der ist dem Herren
ain grewel / vnd vmb solcher grewel willen / vertreibet sy der
Herr dein Gott vor dir her / Du aber solt on wandel sein / mit
dem Herren deinem Gott / dann dise völker / die du einnemen

würst/gehörchen den Tagwölern vnd Weissagern/ Aber du
solt dich nicht also halten / gegen dem Herren deinem Gott/
Ich will aber ainen Propheten (wie du bist) auß deinen brü-
dern erwecken/ vnd mein wort in seinen mund geben/ der soll
reden/ alles was ich jm gebieten werde/ Vnd wer meine wort
nit hören würdt/ die er inn meinem namen reden würdt/ von
dem will ichs fordern/ Vnd disen letzten spruch/ mögen auch
wol zu disen zeyten vnserer newe hin vnd her umbschwebende
Gaister vnd Widerteuffer mercken/ die das Predigamt ver-
achten/ vnd trutzlich on alle schiffte fürgeben/ Predigen/ vnd
Predig hören sey ain vnnütz ding / Da hören sy das gegenspil/
nämlich/ das Got sein wort will gehört haben/ vnd welche es
nicht hören wöllen/ von denen wöllers erfordern. Das ist ja
teütsch vnd klärlich gnüg geredt/ wider solche Gaister. Also
sagt auch Christus deütlich gnüg / Wer euch höret/ der höret
mich/ wer euch aber veracht/ der veracht mich/ Luce 10.

Volget weiter wider die Astrologos

Leuitici am xx.

¶ Wenn ain seele sich zu den warsagern vnd zaichendeütern
wenden würdt / das sy inen nachhüret/ so will ich mein antlitz
wider die selben seele setzen/ vnd will sy auß irem volck außrot-
ten/ Vnd bald hernach/ Wen ain Man oder weib ain War-
sager oder Zaychendeüter sein wirt / die sollen deß todts ster-
ben/ man soll sy stainigen/ jr blüt sey auff inen/ Esaië 8. Wan
sy aber zu euch sagen/ Ir müßet die Warsager vnnnd Zai-
chendeüter fragen/ die da schwätzen vnnnd Disputiern/ solt ir spre-
chen/ soll nicht ain volck seinen Got fragen? Hieremie am 10.

Ir solt nicht der Hayden weiß lernen/ vnnnd solt euch
nicht fürchten vor den zaychen des himels/
wie die Hayden sich fürchten/ denn der
Haydē Götter seind lauter nichts.

Hieher gehöret auch das xij.

Capitel Deuteronomij.

Das erst

Das erst Capitel diser Practica/vom Herren vnd
Regenten/nicht allain dises künfftigen 48.
Jars/sonder aller Jar/biß zum
ende der welt.

ES ist aller zeit vnd jaren von anbeginn der welt / biß
auff dise vnser zeit gewesen / vnnnd wirdt noch biß
inn ewigkait also sein vnd bleiben / ain ainiger Herr
vnnnd gewaltiger Regierer Himels vnd der Erden/ vnd deß/
das darinnē ist/nicht Saturnus/Jupiter/Mars/Sol/oder
Mercurius/wie die Sterndeüter fürgebē/sonder der ainige/
ewige/güttige/barmhertzige vnnnd almechtige Got/ der ain
Vater ist vnser Herr vnd Haylands Jesu Chusti/mit wels
chem seinem lieben angebornē Sun/vnd dem hayligen gaist/
der selbige ewige Herr vnnnd Got/ alles was gemacht vnd zu
Regiern ist/gemacht vñ erschaffen hat/dasselb noch Regiert
vnnnd erhalt/durch sein gnadenreiches wort/wirdt auch also
Regieren biß zu ennd der welt/vnnnd alsdann erst ain solchs
Reich der glou vnnnd herlichkeit anheben vnd anfangen/wie
ers zwar durch die gnadenreiche Predig des hayligen Euang
geliums inn den hertzen seiner glaubigen bald im Paradeiß/
nach dem fahl vnserer ersten eltern angefangē hat/deß reichs
kein ende sein wirt ewigklich/der selb ewig Got vnd schöpffer
aller ding/wirdt laut seines ewigen worts/keinen andern Re
genten oder herrscher neben jm leiden oder wissen wöllen/wes
der hie im zeitlichē reich/noch dort im ewigen/Seitemal aber
gleichwol hie in disem zeitlichen lebē/neben dem reich gottes/
ain anders/nämlich des Sathans reich / sich immer zu mit
macht vnd grossen gwalt/vñ in mancherlay weg vnd weys/
yetz mit abgöttischen vnd kezerischen leeren/denn mit aller
lay bosshaiten vnd sünden/eindringet/wie dann das gemain
sprichwort laut/das der Meüs mist stäts will vnder dem pfef
fer sein/vnd wütet vñ tobet solchs reich des Satans on vnter
laß wider des reich Gottes/vñ wider alle desselbē reichs glider
vnd verwantē/ist auch derselb sich mit eindringende Regent

so mächtig / das in Christus selbst / ainen gewaltigen Fürsten
diser welt / vnd ainen Fürsten der Finsternissen nennet / leeret
vns auch Math. 6. den vatter bitten / das er vns von solchem
bösen erlösen wöll / Vñ sagt Johannes in seiner erstē Canoni-
ca am 5. ca: Die ganze welt lig inn jme / So sollen warlich wir
(die von Got gefüret werden / vnd des ewigen reichs teilhaf-
tig sein wöllen) erstlich mit so sicher dahin leben / als were lau-
ters kain Got / der die sünd straff oder hainsüche / Nachmals
aber den ewigen güetigen Got / on vnderlaß / nach der leer vnd
dem beselch seins lieben Sunns Jesu Christi / bitten vñ flehen /
das sein Nam gehailiget werde / vñ sein Reich zu vns kume /
das ist / das er vns inn disem zeytlichen vergenglichen leben /
also wölle regieren vnd füren / das wir vns ganz vnd gar / in
vnd vnder seinen willen vñnd gehorsam thun / vnd begeben /
nichts anders sinnen / dencken / schaffen vnd handlen / dann
dardurch er geehrt / gelobt / vnd gehailiget möchte werden / vñ
das also er allain / vnd sunst niemant anderst / erstlich hie das
Reich der gnaden inn vnns anfahen / vnd nachmals ainmal
vom himel herunder kōmen / im ewigen reich seiner glori vnd
almachtigkeit erscheinen / den Teüfel mit aller anderer Gotlo-
sen regierung stürzen / aller Tyranny / lügen / vñnd alles des /
das seiner regierung sich widersetzt / ain ende machen / vns da-
von genädiglich erlösen / vnd mit sich einfüren wölle / in das
ewige genadenreich / inn welchem er alles in allem wirdt sein /
vnd bleiben ewiglich / Vnd also on end regieren vñ herrschen
mit seinem lieben Sun Jesu Christo / vnd dem hailigen Geist /
in welches reich vns allen verhelffen wölle / der ewige vatter
im himel / durch seinen Sun Jesum Christum Amen.

Folgen bewensung auß Gottes wort / das er
allain der herr vñnd herrscher seye /
vnd sein wölle ewiglich.

Ich / ich (sagt der Herr Zebaoth) bin der Herr dein Gott /
ain eyferiger Gott ic. Was hie eyferig haisset / versteht yeders

man wol/er will stracks allain regieren durch sein Allmechtig
kait/durch sein wort/durch sein Oberkait/durch sein prediga
ampt/vnd diß ampt der höchsten regierung aller ding jm als
lain behalten/vnd stracks niemandt anders einreymen. Vol
get weyter auß Gottes wort.

Deuteronomij xxxij.

Sehet jr nun/das ichs allain bin: Vnd ist kein Gott nes
ben mir.

Zosue am ij.

Der Herz ewr Got/ist ain Got/baide/oben im himel/vnd
vnden auff erden.

Dauid im xxiiij. Psalm

Die erd ist des Herren/vnd was drinnen ist/erdboden vnd
was darauf wonet. Vnd bald hernach/Der starck vnd mechs
tig/der ist der König der ehren.

Dauid im cxxxv. Psalm.

Ich weiß/das der Herz groß ist/vnd vnser Herz für allen
göttern/alles was er wil/das thüt er/im himel/auf erden/im
meer/vñ in allen tieffen/der die wolcken lasset aufgehn/vom
end der erden/der die Blitzen sampt dem Regen machet/der
den wind auß haimlichen örtern kōmen laßt/Daher gehört
auch der ganze 136. Psalm Dauids.

Im cxlvij. Psalm.

Vnser Herz ist groß/vnd von grosser krafft/vnd ist vnbes
greifflich/wie er regieret.

Esaie am xliij.

So spricht der Herz/der König Israel/vnd sein erlöser der
Herz Zebaoth/ Ich bin der erst/vnnd ich bin der letst/vnnd
ausser mir ist kein Got.

Esaie am xlv.

Ich bin der Herz/vnd kainer mehr/der ich das liecht mach/
vnd schaff die finsternuß. Vnd bald hernach/ Ich hab die erdē
gemacht/vnd den menschen drauf geschaffen/ Ich bins/ des

hend den himel außgebraitet habē/ vnd hab allem seinem heer gebotten.

Amos iiii.

¶ Siehe er ist es/ der die berg machet/ den wind schafft/ er machet die Morgenröte vnd die Finsternuß.

Hieremie x.

¶ Dir Herz ist niemandt gleich/ du bist groß/ vnd dein Nam ist groß/ vñ kansts mit der that beweysen / Hieher gehört das ganz ain vnd fünffzigst Capitel Hieremie.

Jesus Syrach am j. Capitel.

¶ Ey er ist/ der aller höchst/ der schöpfer aller ding/ allmächtig/ ain gwaltiger König/ vnd sehr erschöcklich/ der auf seinem thron sitzet/ ain herrschender Gott.

Danielis am iiii. Capitel.

¶ Es ist im Rath der wächter/ vñ im spruch der hailigē Gottes beschlossen/ das die menschen wissen sollen/ das der aller höchst gewalt habe über die Königreich der menschen / vnd gibt sy wem er will.

j. Corinth. viii.

¶ So wissen wir nun das ain Götz nichts in der welt sey/ vnd das kein anderer Got sey/ on der ainige/ vnd wie wol es seind/ die Götter genent werdē/ es sey im himel oder auf erden (Seitenmal es seind vil Götter vñ vil Herren) So haben wir doch nu ainen Got/ den vater/ von welchem alle ding seind/ vñ wir inn ime/ vñnd ainen Herren Jesum Christum/ durch welchen alle ding seind/ vnd wir durch ime.

Ephesios. iiii.

¶ Ain Herz/ ain Glaub/ ain Tauff/ ain Gott/ vnd Vatter vnser aller/ der da ist über euch allen/ vnd durch euch allen/ vñnd inn euch allen.

j. Timothy. ij.

¶ Es ist ain Gott/ vnd ain Mittler / zwischen Gott vnd den menschen/ nämlich/ der mensch Jesus Christus.

¶ Jesus Christus/gestern vnd heüt/vnd der selb auch in ewigk
keit.

**Das ander Capitel/von den Finstern
nussen/dises vnd aller Jar/vnd wie man
müge vor sollichen Finsternussen
behütet werden.**

¶ Finsternussen nennet die hailige Göttliche schrift/hin vnd
wider/den vnglauben/das gotlos wesen/die grosse vnwissen
hait vnd blindthait der welt/vnnd des ganzen menschlichen
geschlechts/welches mit den sünden überschütt vnnd übers
schwemmet ist/wie im anfang der welt vor erschaffung des
liechts/alles im finstern schwebende/Gen. 1. Dise ganze welt
(saget Johannes) steckt vnd ligt im argen/vnd ist in den fin
sternussen dermassen ersoffen vnd verschwemmet/das sy sich
stracks des ewigen liechts Christi Jesu des gesanten sun Got
tes (ob wol solches liecht in alle winckel leuchtet) gar nichts
will annemen/vil weniger sich solliches liechts süren/laiten/
maßstern oder Registriern lassen/vō solcher finsternuß/blüt
hait vñ thorbait des menschlichen geschlechts/Predigt auch
Christus Johan. am 3. dem Nicodemo/da er sagt/Wer an in
glaube/werde nicht gericht/wer aber nicht glaube/sey schon
gericht/denn er glaube nicht an den namen des eingebornen
sun Gotes/das sey aber das gericht/das das liecht in die welt
kommen ist/vnd die menschen lieberen die finsternussen mehr
dann das liecht/dise finsternuß ist ye vnd ye auff erden vn
ermesslich groß/vnnd greulich gewesen/vnnd hat allzeit den
grossen hauffen des menschlichen geschlechts inngeliebt/wie
solches aller welt Historien bezeügen/dann da hellt der grosse
thail des menschlichen geschlechts Gottes wort (welches al
lain soll sein das liecht der welt/das in vns anzünden soll das
ewige liecht/das ist/Gottes erkantnuß/ewige gerechtigkeit/

vnd ewigs leben / vnd die leuchte füss) nur für ain vntüchtis
ge vergebliche Sabel / vnd für ain vnnütz geschweiz / als die
Historien von dem Ritter Tuntalo / vnd andern dergleichen
mehren / So seind darnach vil leüt / die es für ain schedliche
leer halten / woltens derhalben gern gar austilcken vnd vns
dertrucken / wa sy es nur vermöchten / vnd ist also das liebe
Euangeliū (wie ain klain süncklin seirs in der stück finstern
nacht) nichts anders dann ain klains glüends dächtlin / wel
ches in etlicher / vñ zwar sehr weniger menschen hertze glüet /
vnd leuchtet / da daneben die ander ganze welt nichts dann
eytel arges vnd lautter finsternuß ist / welches die ersten **Epi
stel** Johannis gewaltig leeret vnd bezeüget. Also bian dises
liechtlin bald im Paradeiß / da der ewig Got nach vnserer ers
sten Eltern fahl / den Hailand verhieß / der disen fahl solte wi
derumb erstatten. Es ward auch dem Cham vnd seinem
hauffen fürgetragen / aber sy bliben stracks finsternuß / ver
achteten das liecht / erschienen auß denen die zu Noah zeitten
vor der sündflut. Vñ vnderm Loth vor der punst zu Sodom
vnd Gomorra. Vnder dem Tyrannen Pharao / vor der ers
seüffung im Roten Meer. Vnder den kindern Israel / vor irer
Künigreich vnd Policeyen zerstörung / inn allen sünden vnd
finsternussen / gelebt haben / Aber finsternuß sein finsternuß
bliben / das ewig liecht ist von wenigen angenommen / sonder
von dem grossen hauffen verachtet vnd verlachtet worden /
Also war zur zeyt der geburt vnd des sterbens Christi / ain
merckliche finsternuß / nicht allain im Jüdischen volck / son
der im ganzen menschlichen geschlecht / welliches den Hays
land vnd das liecht der welt / nit kennet / der Schächer aber
am Creütz / Maria / Johannes / die hirten auff dem veld / die
weyssen auß Orient / Simeon / Zacharias / vnd wenig andere
kenneten es / nicht allain / sonder namē es auch an / vnd wur
den dardurch Kinder Gottes / da die ander ganze welt im ar
gen blib ligen / vnd hat on zweyfel die übernatürlich finster
nuß / die zur zeyt des leidens vnd sterbens Jesu Christi gewest
ist / nichts anders bedetit / dann die grosse merckliche finster

muß der ganzen welt / die jr ewigs liecht nicht kennen / noch
annemen hat wöllen / sonder es auch auß zuleschen sich vnder
standen / welches doch nicht gar erloschen / sonder hernacher
vil häller worden ist / leuchtet noch heütigs tags / vnd wüdt
leuchten ewigklich. Nun ist aber solchs liecht nun auch vns
Hayden erschinen / vnd auß lautter gnaden mitgetaillet wor
den / vñ leuchtet dises ewige liecht Jesus Christus / durch den
herlichen glast seines gnadenreichen worts gewaltig / vñnd
mehr zü vnsern / als den letsten / dann zü andern zeyten / aber
es geht doch laider auch zü disen vnsern zeitten zü / wie es ye
vnd allzeit gangen ist / vnd sonderlich bey den Juden gieng /
darüber Johannes der Euangelist hefftig vñnd jämerlich
klagt / im ersten Capitel seines Euangelions / da er sagt / Im
wort war das leben / vñnd das leben war das liecht der mens
schen / vnd das liecht scheint in der finsternuß / vñnd die fins
ternuß habens nicht begriffen. Vnd bald hernach / das war
das warhafftige liecht / welches alle menschen erleuchtet / die
in dise welt kömen. Es war in der welt / vñ die welt ist durch
dasselbige gemacht / vnd die welt kandte es nicht / Er kam in
sein eigenthumb / vñnd die seinen namen jne nicht auff / Dar
umb sagt Christus nicht vnbillich Mat. 7. Der weg zum lebē
sey schmal vnd eng / der ander aber / der zum tod vnd ins ewig
verderben füre / sey breit vnd wol gebanet / vnd werde von vi
len gewandelt / dardurch die engen pforten wenig eingehn /
welches warlich schrockenlich zü hören ist. Nun ist höchlich
zū besorgen / seytenmal auch wir vnns deß erschinen liechts so
gar wenig vnd schläfferig annemen / vnd durch dasselb nicht
allain mit vil liechter / sonder schier finsterer werden / in dem /
das wir vns solches von Gott gegebenen liechts nur vnser ge
fallens mißbrauchen / ist warlich wie gesagt / zū besorgen vnd
zufürchten / Gott wölle solliches helle liecht yetz wider von
vns nemen / vnd dargegen vmb vnser grosse vnd anckbarkeit
willen (weil man doch das liecht nicht haben noch recht an
nemen will / vnd dise gnädige Gottes haimsüchungen so wes
tig besserung bey vns schaffet) vns widerumb inn finsternuß

vnd ewige blindheit/durch abziehung seiner hend/vñ durch
seines worts / vnd seiner gaben entwendung fallen zulassen/
des dann auch dises nicht ain geringe anzaigung/sonder ain
fürlauffende verkündigerin ist / das man zu disen zeitten der
Schülen/vnd rechtschaffner der kinder vñnd herwachsenden
Jugent vnterweysung/so gar nichts achtet / yederman nur
trachtet wie ers dahin bünge/ das jm sein kind zur narung die
nen vñnd helfen künde / vnangesehen was die vilfältigen
ernstlichen befehl Gottes / den Eltern von aufferziehung
ihrer kinder fürhalten / darumb wol hohe zeit wäre/auß dem
tieffen schlaff diser Finsternuß auff zuwachen / büß zuthun/
vnd ernstlich vmb zukeren. Also/das/ wer zuvor hette gesto-
len/gehüret/betrogen/Steele/ Hüre/betrüge nu nicht mehr/
Wer zuvor wer ain Held gewesen/ Wein vñ Bier zusauffen/
Wie Esaias am 5. sagt/ derselb bessere sich auch/ leb in zucht
vnd mässigkeit / vnd kere ain yeder wider / in dem / da er sich
innē wuste schuldig sein/so wurde sich one zweyfel/nach laut
seiner vilfältigen zusagungen/ der gütige gnädige Got/gnäs-
dig widerumb zu vns keren / vnser herzlich erbarmen / das
licht nicht von vns nemen / welliches vns Gott lob ja noch
leuchtet / aber doch inn disen schwären leüssen sich ansehen
laßt/als wölle es fürbaß wandern/welches so es geschehe/da
Gott genädiglich vor sey / wer nicht anders züermüeten/
dan ewiger finsternuß vñ blindheit/ höchstes hertenlaids/
vnd ewigs verderbens.

¶ Auf das wir aber vor solchē jamer vnd finsternussen behüt-
tet werdē/ist fürnämlich von nöten/ das wir das ewig licht
(welches Gottes wort vnd Christus selbst ist) rechtschaffen
voraugen haben/ dasselbig gern vnd mit fleiß hören/wie wir
des ernstlichē befehl haben/dan da Got Christum seinen sun
dem menschlichē geschlecht zum Prediger vom himel schickt/
schrye er darneben herab / diß ist mein geliebter sun / durch
welchen ich versünet bin/ den höret/ Vnd Deuteronomij 18.
sagt Got/ Wer meine wort nicht hören wirdt / von dem will
ichs fordern/ Wir sollē auch die Biblischē schrifften selbst mit
fleiß

fließ lesen/ dann vns der ewig Gott/ dieses theür büch (welchs der hailige gaist selbst maister ist) nicht darumb so lange zeyt erhalten hat/ da darneben viler tausent geleter treffenlicher leüt bücher vnd schrifftē sein zū boden gangen/ das nur Pappir machet/ Büchtrucker vnd Büchfürer/ sollen damit handtiern vnd jren gnieß süchen/ sonder das wirs fleissig lesen/ vñ wie Christus Johannis am fünften sagt/ erforsche/ vñ vnsern Kindern vnd haußgesind fürhalten/ vnd es jnen scherpffen sollen/ wie Gott klärlich sagt Deuterono. am sechsten/ Dise wort soltu zū herzen nemen/ vnd solt sy deinen Kindern scherpffen vnd dauon reden/ wenn du inn deinem hauß sitzt/ oder auf dem weg gehst/ wenn du dich niderlegest/ oder aufstehst/ vnd solt sy binden zum zaichen auf deine hend / vnd sollen dir ain denckmal vor deinen augen sein/ vnd solt sy über deines hauß pfoffen schreiben/ vnd an die thor. Gleicher mainung befilcht vnd gebet Gott auch Deuteronomij am 11.

Zum andern sollen wir vns zū rechtschaffner vngeserbter büß begeben / von allem dem das Gottes wort verbeit / abstehn/ Dem jhenigen aber/ das Got gebet vñ von vns erfordert/ mit fleiß nachtrachten/ vnd gehorchen/ vns vor sünden vnd allem vnnützen Gotlosen vnd leichtfertigen geschweze hütten/ vnd allzeit gedencen/ des Augs/ das alle ding siet/ des ohrs/ das alle ding höret/ des büchs/ darin all vnser thün geschriben ist/ vnd entlich auch des strengen Richters stül / vor dem wir (wie Christus die ewige warhait Mathei 12. selbst sagt) auch von einem yeden vnnützen wort müssen Got rechenschaft geben/ dann Got will sein wort nicht allain gelesen/ gehört vnd gelernet haben/ sonder auch gethon/ wie er solchs hin vnd wider inn der schrifft ernstlich von vns fordert / mit freündlichen verhaissungen vnd ernstlichen schrecken/ betröwungen/ sonderlich Exodi am 20. capitel/ da er sagt. Dann ich der Herz dein Got/ bin ain eyseriger Got/ der da hainsücht der Vätter missethat an den Kindern / inn das dritt vnd viert glid/ die mich hassen / vñnd thū Barmherzigkeit an vil tausenten/ die mich liebhaben/ vñnd meine gebott halten. Vnd Deut. 12.

sagt er/ Alles was ich gebietete/ das solt jr halten/ das jr dar-
nach thut/ vnd im 27. ganzen vnd 28. capitel/ redet er auß
ernstlichest von sollichem gehorsam/ den er stracks von vns
fordert/ vnd haben will. Vnd Numeri 15. spricht er/ Darumb
solt jr gedencfen/ vnd thun alle meine gebott/ vnd hailig sein
ewerm Got/ vnd eben in disem Capitel/ sagt Got mit schreck-
lichen ernstlichen Worten / Wann ain seele auß fräuel ettwas
thut der hat den Herren geschmächt/ Solche seele sol außge-
rottet werden auß jrem volck/ den sy hat des Herren wort ver-
achtet/ vnd sein gebott lassen faren/ Sy soll schlecht auß ge-
rottet werden/ die schuld sey jr.

¶ Zum dritten vnd letsten/ sollen wir vor allen Finsternussen
behütet vñ bewaret werdē. So ist zum höchsten von nöten/
das wir nüchtern seyen/ vnd betten/ den der Herz der Finster-
nussen/ vnd Fürst diser welt/ rüwet vñ feyrt nit/ So ist er nit
zū Babylon oder zū Alkheyr/ sonder rings umb dich her / an
allen orten / Ja durch seine feürige pfeyl inn dir vnd deinens
sündigen flaisch/ ja auch in deinen gedancfen selbst: Dann als
so redet Petrus von jme/ in der ersten Epistel am andern cap.
Er gehe herumb/ wie ain prüllender Löw/ vnd süchet on vns
derlaß/ wen er verschling / Vermanet vnns auch derhalben/
wir sollen nüchtern sein/ vnd wachen/ vnd solchem vnserm
widersacher on auff hören widerstand thun/ Starck im glaus-
ben/ wie auch ain yeder (der vor disem feind/ vnd vor solchen
Finsternussen will sicher sein) solle gewapnet vnd gerüstet
sein/ leeret Paulus ferner im sechsten capitel an die Epheser/
Das soll ain yeder Christ lesen/ lernen/ vnd sich darnach rich-
ten/ Das helff vns der Ewig güttig Gott/ der vns vor aller
Finsternuß gnädiglich wöll behütten / durch Christum sein
nen Sune/ Amen.

**Das dritt Capitel/ Vom gewächs der Früchten/
vnd fruchtbarkeit des Erdrichs/ dises
vnd aller Jare.**

Fruchtbarkeit des Erdrichs / vnnnd allerlay wachssende
frucht / seind Gottes segen / können derhalben nicht durch
des jars Dominum fortune / oder dises vnd ihenes güten Plas
neten Coniunction ins hauß Jouis / oder ainen güten Aspes
ctum Lune fallend / oder durch ander dergleichen Influentz
der gestirn vnnnd zaichen des Firmaments / wie die Astrologi
vergeblich vnd wider Gottes wort dauon schwägen / sonder
allain auß milter hand des güttigen barmherzigen Gottes /
ders von anbeginn / durch sein Allmächtigs wort also geord
net hat / das vns das Erdrich alle jar tragen vñ geben muß /
was vns zü erhaltung dises zeytlichen lebens von nöten ist /
Dan also lesen wir im büch der Geschöpff am ersten Capitel /
Es lasse die erd auffgehn gras vnd kraut / das sich besame / vñ
fruchtbare bäwme / da ain yetlicher nach seiner art frucht tra
ge / vnnnd habe seinen aigenen samen bey jm selbst auff erden /
darumb hat vns vnser Herz vnd Hayland Christus nit bitten
haissen / Vatter / gib gütige Coniunctiones der Planetē / schaff
das deine Gestirn sich freündelich anainander ansehen / das
dardurch das erdrich fruchtbar werde / vnnnd wir menschen
auff erden züessen haben zc. Sondern nach dem er selbst das
erdrich im anfang hat fruchtbar gemachet / hat er vns vnser
täglich brot von niemant anders bitten vñ warten haissen /
dann von jm selbst / vnnnd von seinem vnd vnserm himlischen
vatter / hat vns auch zügesagt / Johannis am 16. ca. Was wir
den vatter in seinem namen bitten werden / das werde er vns
willig vnd gern geben. Wöllen wir nun dises segens des ewi
gen vatters vilfältig werden / so müssen wir kinder Gottes /
das ist / Gotsfürchtig vnd frum sein / nach seinem willen vnd
gebotten leben / vnd solche gaben von jm allain bitten / vnnnd
gewärtig sein / das ist die ganze hailige schrifft vol / auß wels
cher ich etliche fürnämliche sprüch erzelen will Deuterono.
am 28. Capi. sagt Got also / Wenn du der stin des Herren deis
nes Gots gehorchen wirst / das du haltest vnd thust alle seine
gebott / die ich dir heüt gebeüte / So wirdt dich der Herz dein
Got / das höchst machen über alle völder auß erden / vñ wer

Den über dich können alle diese segnen / vnd werden dich treffen /
darumb das du der stamm des Herrn deines Gots bist gehorsam
gewest / Gesegnet wirst du sein / die frucht deines leibs / die
frucht deines lands / vñ die frucht deines vichs / vñ die frucht
deiner Ochsen / vnd die frucht deiner Schafe. Gesegnet wirt
sein dein Korb vnd dein übriges / Vnd bald hernach / vnd der
Herr wirdt dir seinen gütten schatz auffthun / den himel / das er
deinem lande Regen gebe zu seiner zeit / vnd das er segene alle
werck deiner hende / vnd du wirst vilen völkern leyhen / Du
aber wirst von niemant borgen / vnd der Herr wirt dich zum
haupt machen / vnd nicht zu schwantz / vnd wirst oben schwe
ben / vñ nicht vnden ligen / Darumb das du gehorsam bist den
gebotten des Herren deines Gottes / die ich dir heüt gebiete zu
halten / vnd zu thun.

Leuitici am xxvj.

Werdent jr in meinen satzungen wandlen / vnd meine ge
bott halten / vnd thun / So will ich euch Regen geben zu sei
ner zeit / vnd das land soll sein gewechs geben / vnd die bewine
auff dem velde ire frucht bringen / vnd die Tresch zeit soll raich
chen bis zur Weinerndten / vnd die Weinerndten sol raichen
bis zur zeit der Saat / vnd sollen brots die fülle habē / vnd solt
sicher in ewerem land wonen / Vnd im 25. Capitel sagt Gott
abermals / Thut nach meinen sätzen / vñnd haltet meine
Recht / das jr darnach thut / Auff das jr im land sicher wonen
mögt / dan das land sol euch seine frucht geben / das jr zu esser
gnüg habt / vnd sicher darinnen wohnet / Vnd ob du wurdest
sagen / was sollen wir essen / Im sibenden jare / dann wir saen
nicht / so sammeln wir auch kein getrayde ein / Da will ich mei
nen segnen über euch im sechsten jar gebieten / das er soll dreyer
jar getrayde machen ic.

Deuteronomij viij.

So hätte dich nun / das du des Herren deines Gots nit vers
gesset / damit das du seine gebot vnd seine gesatz vnd Rechte /
die ich dir heüt gebiete / nicht haltest / das / wann du nun geessen

hast/vnd voll bist/vnd schöne herwser erbarwest/vnd drinnen
wohnest/vnd deine Kinder vnd Schaf/vnd Silber vñ gold/
vnd alles was du hast/sich mehret/das denn dein hertz sich
nicht erhebe/vnd vergessest des Herren deines Gots 2c.

Esaië am i.

¶ Wolt jr mir gehorchen/so solt jr des landts güt geniessen/
wegert jr euch aber/vnd seyt vngheorsam/so solt jr von dem
schwert gefressen werden.

Esaië am 10.

¶ Wolan alle die jr durstig seyt/kumbt her zum Wasser/vnd
die jr nit gelt habt/kumbt her kauffet vnd esset/kumbt her vñ
kaufft one gelt/vnd vmb sunst/baide Wein vnd Milch/war
umb zelet jr gelt dar/da kain brot ist? Vnd ewer arbeit/da jr
nicht satt von werden/komet höret mir doch zü/vnd esset das
gütte/so wirdt ewer seele in wollust fett werden.

Dauid im 10. Psalm.

¶ Würff dein anligen auf den Herren/der wirdt dich versors
gen. Vnd im 37. Psalm/ Ich bin Jung gewesen vnd alt wor
den/vñ hab noch nye gesehen den gerechten verlassen/oder
seinen samen nach brot geen.

Matthæi am vi. sagt Christus.

¶ Sorget nit für ewer leben/was jr essen vñ trincken werdet/
auch nicht für ewern leib/was jr anziehen werdet/ Ist nicht
das leben mehr dann die speys/vnd der leib mehr dan die klai
dung? Sehet die vögel vnder dem himel an/sy säen nicht/sy
erndten nicht/sy sammeln nicht in die scheüren/vnd ewer himes
lischer Vater neeret sy doch/Vnd bald hernach/Darumb solt
jr nicht sorgen/vnd sagen/Was werden wir essen? was wer
den wir trincken/wamit werden wir vns klaiden? Nach sol
lichem allem trachten die Haiden/Dañ ewer himelischer Vas
ter waist/das jr des alles bedöffen/Trachten aber am ersten
nach dem Reich Gottes/vñ nach seiner gerechtigkeit/So
wirdt euch solches alles züfallen.

Das vierdt Capitel / Von vnfruchtbarkeit des
Erdrichs / Theüerer zeit / Kranckhaiten/
Kriegesleüffen/ Frid vnd vnfrid/
dises vnd aller Jar.

Vnfruchtbarkeit des Erdrichs/darauß dann theüere zeit
vnd hungers not volgen. Item Kranckhaiten vnnnd böse
süchten allerlay art/wie sy mögen geneht werden. Desgleichē
Krieg/Auführ/ Vnfrid/ Mord/ verlust hab vnd güter/ ges-
fängknus/grosse Brünstē/vnd was Treüm solches vnglücks
mehr auf erden/ vnder dem menschlichen geschlecht/ist vnd
schwebet/ seind straff vnserer vilfältigen sünden/ vnd misse-
that/mit denen wir vns baide/an Got vnd vnserm nächsten
on vnderlaß vergreyffen/durch solche straff vñ haimsuchung
wil vns der Almächtig gütig Got (der vns hertzlich lieb hat)
zur büß vnd zum gehorsam ziehen vnd bewegen/welches will
vnd mainung nit ist/das yemandt verloren werden soll/son-
der wölte gern/das yederman sich bekörte seinem wort vñ ge-
bot gemäß lebet/vnd selig wurd/laut seines ernstlichē worts/
das er redt durch den Propheten Ezechiel am 33. Capitel/So
war als ich lebe/ich hab kain gefallen am todt des Gotlosen/
sonder das sich der gotloß beker von seinem wesen / vnd lebe/
Nun ist kain mensch auf erdē/er wölte gern sällig werden/vñ
ewigklich leben/So ist kain mensch/er wölte gern glück vnd
wolffart auch auff erdrich inn disem zeytlichen leben haben/
wolte gern das jm Got die arbeit seiner hend wol erschiesse
ließ/das er inn güttem frid still vnd sicher vor feinden möchte
leben/das Got gut wetter/ vnd seinen segen/ allem gewächs
auff erdrich gebe ic. Aber da will niemandt hin dencken/das
der Almächtig Gott alsdenn wurde geben/was wir wolten/
wan wir zuvor auch thäten/ oder doch nur ain wenig zuthün
gedächten / was wir solten / Das aber nun er thün solt was
wir wöllen / vnnnd wir nur allen ungehorsam gegen jm brau-
chen vnd üben/sein gebot verachten/jm gar nichts vertrau-
wen/vnnsern nächsten allenthalb (wa wir nur können vnd

mögen/vnnd nichts güts anainander gönnen wöllen/vnnd
wenn er nur ainmal nicht wetter gibt vnnsers gefallen/ das
wir alsbald wöllen mainen / er könne vnns nun nicht mehr
füllen/heben alsbald an / mit vnserm Wein vnd Korn (das
wir etliche Jar zusammen gescharet) auffzuschlagen/vnnd
theürung in die land zubringen/vnd was vntrew mehr vnder
den leüten gemain ist/ das reymet sich kains wegs zusammen/
ist auch Gottes mainung gar nicht/das er also sich vnnd sein
wort wölle verachten lassen/vnd nur er darneben thün/was
vns gefellig ist/ Sonder es wurde also lauten.

Wen jr auf erden nur thün wölt/
Was euch gut dunckt vnd euch gefelt.
Vnd wölt nit volgen meinem wort/
So leydet auch/was drauf gehört.

¶ Nun haben wir aber oben auß den angezognen Biblischen
sprüchen gnügsam gehört/wie wir vns gegen Got halten sol
len/nemlich/sein wort hören/lernē/ vnd halten/halten haist
es (sag ich) nicht nu wissen vil dauon zuschwägen/ So wur
de vns alsdan der ewig gütig Gott (wie gehört) als ain früs
mer gütiger vater/ seinen gehorsamen kindern widerumb als
les thün vnd geben/ was er solle/ vnd was vns nutz vnd gut
were zü seel vnnd zü leib/ Wöllen derhalben nun auch hören/
wie er sich halten wölle gegen denen / die inn ainem vnbüß
fertigen leben fort faren / ine vnd sein wort weder hören noch
sehen wöllen / oder ob sy Gottes wort schon hören / doch das
selb nicht halten/ sonder in aller frechait mit willen vnd vn
gerechtigkait/ on alle Gottsforcht dahin leben / als sey kain
Gott/der solliches alles sehe/oder straffen wölle / oder könne
hie zeitlich vnd dort ewiglich ic.

Volgen auß Gottes wort tröwungen/von
vnfruchtbarkeit des Erdrichs/
vnd theürer zeyt ic.

Leuitici am xxvj.

¶ Werdet jr mir aber nit gehorchen/ vnd nit thün dise gebott alle/ vnd werdet meine sayungen verachten/ vnd ewere seele mein rechte verwerffen/ das jr nit thüt alle meine gebot/ vnd werdet meinē bund lassen anstehn / so wil ich euch auch solchs thün/ Ich will euch haynsüchen mit schrecken/ schwalst vnd sieber/ das euch die angesicht verfallen / vnnd der leib verschmachte/ Jr solt vmb sunst ewern samen säen/ vnnd ewere feind sollen in aufffressen/ vñ ich will mein antlitz wider euch stellen/ vnd solt geschlagen werden/ vor ewern feinden/ vnnd die euch hassen/ sollen über euch herschen/ vnd solt fliehen/ da euch niemandt jagt / So jr aber über das noch nit mir gehorchet/ so will ichs noch sibennmal mehr machē/ euch zustraffen/ vmb ewre sünd/ das ich ewern stolz vnd halbsstarigkeit bresche/ vnd will ewern himel wie eysen/ vnd ewre erde wie Erz machen. vnd ewer mühe vnt arbeit sol verlorn sein/ das ewer land sein gewächs nit gebe/ v. id die bäum im lande ire frucht nicht bringen. Vnd bald hernach/ Ich will euch den vorhat des brots verderben / das zehen Weiber sollen ewer Brot inn ainem Ofen backen/ vnnd ewer Brot soll man mit Gewicht außwegen/ vnd wann jr esset/ solt jr nit satt werden/ Liß das ganz Capitel/ dann es vol solcher tröwungen ist.

Deuteronomij am xxviij.

¶ Wan du aber nit gehorchen wirst / der stim des Herren deines Gots/ das du haltest vnd thüst alle seine gebot vñ rechte/ die ich dir heüt gebiete/ so werdē alle dise fluch über dich kommen/ vnd dich treffen/ Verflucht wirst du sein in der Statt/ verflucht auff dem Acker/ verflucht wirdt sein dein Korb/ vñ dein überigs/ verflucht wirdt sein die frucht deines leibs / die frucht deines Lands/ die frucht deiner Ochsen/ vñ die frucht deiner Schafe/ verflucht wirstu sein/ wan du eingehst/ verflucht wirstu sein/ wan du außgehst. Vnd bald hernach sagt der Prophet weytter / Dein himel der über deinem haupt ist/ wirdt ohrin sein/ vnd die erden vnter dir eisern/ Der Herr wirt
deinem

deinem Land / Staub vnd äschen für Regen geben / vom himel
auff dich / biß du vertilcket werdest / der Herz wirdt dich vor
deinen feinden schlagen / durch ainen weg würstu zu jnen auß
ziehen / vnd durch siben wege würstu vor jnen fliehen / vnd
würst zerströwet werden / vnder alle Reich auff erden / dein
Leichnam wirdt ain speiß sein allem geügel des himels / vnd
allen thier auf erden / vnd niemandt wirdt sein der sich schweiß
het. Vnd bald hernach / Du wirst samen aussüren auff des
feld / vnd wenig einsamlen / dann die Herwschrecken werdens
abfressen / Weinberg würstu pflanzen vnd bawen / aber kein
nen wein trincken / noch lesen / dan die Würme werdens ver
zeeren / Liß das ganz Capitel / dann es tröwet noch vil schö
ckenliche ding / die wir zu disen zeytten / alle augenscheinlich
sehen.

Esaië am v. Capitel.

Mein Lieber hat ainen Weinberg an ainem fetten ort / vñ
er hat jne verzeünet / vñ mit stain hauffen verwaret / vnd edle
Reben darein gesteckt / vñ er wartet / das er Trauben brächt /
aber er bracht Herlinge. Tu richtet jr Burger zu Jerusalem /
vnd jr männer Juda / zwischen mir vnd meinem Weinberg /
Wolan ich wil euch zaigen / was ich meinem Weinberg thun
will / Sein wand sol weck genömen werden / das er verwüstet
werde / vnd sein Zaun soll zerissen werden / das er zertretten
werde / Ich will jne wüst ligen lassen / das er nitt geschnitten
noch gehacket werde / sonder Distel vnd Dorn darauff wach
sen / vnd will den Wolcken gebieten / das sy nit darauff regnē /
Sehen Acker Weinberg sollen nur ainen Aimer geben / vnd
ain Malter samens soll nur ainen Schöffel geben. Zieher
gehört auch das fünff vnd sechzigst Capitel Esaië.

Jeremie am ij.

Darumb muß auch der Frü regen aussen bleiben / vnd kein
Spat regen kommen / du hast ain Hürnstirn / vnd will dich
nicht mehr schämen.

Hiere mie am xij.

¶ Sy säen Wayzen/aber Disteln werden sy erndten/ Sy lassens jnen saur werden/aber sy werden es nitt niessen/ Sy werden jres einkömens nit fro werden/vor dem grimmigen zorn des Herzen/ Amos am vierdten.

Aggei am Ersten Capitel.

¶ Ir wartent wol auf vil/ vnd sihe es wirt wenig/ vnd ob ir schon haimbringt/so zersteüß ichs doch/ Warum das? spricht der Herz Zebaoth/ Darumb/das mein hauß so wüß steht/ vnd ain yetlicher eylet nur auff sein hauß/ darumb hatt der himel über euch den Thaw verhalten / vnnnd das Erdtrich sein gewächs/ vnd ich hab die dürrer gerüßten/ bayde über Land vnd Berge/über Korn/Most/Ole/ vnd über alles was auß erden kumbt/auch über leüt vñ vihe/ vnd über alle arbeit der hend. Vnd ain wenig daruor sagt Got der Herz Zebaoth/Schawet wie es euch geht/ Ir säet vil/ vnd bringet wenig ein/ Ir esset/ vnnnd werdet doch nit satt/ Ir trincket/ vnnnd werdt doch nit truncken/ Ir klaidet euch/ vnd kündt euch doch nit erwermē/ vnd welcher gelt verdient/der legts in ainen löcherten beütel.

Volgen auß Gottes wort ernstliche eröwungen/ von allerlay Kranckheiten.

¶ Werdet jr aber euch damit noch nit züchtigen lassen/vnnnd mir entgegen wandlen/so will ich euch sibemal mehr schlagen/vmb ewer sünden willen/vñ will ain Rachschart über euch bringen/das meinen bund rechen soll/ vnd ob jr euch inn ewere Stett versamlet/will ich doch die Pestilenz vnder euch senden/vnd will euch in ewerer feinden hende geben.

Deuteronomij am xxviij.

¶ Wann du nicht gehorchen wüßst der stim des Herzen deines Gottes ic. So wirt der Herz vnter dich senden vnfall/vnrhat vnd vnglück/ inn allem das du für diehend nimmest/ das du

thust/biß du vertilcket werdest/ vnnnd bald vndergehst/ vmb
deines bösen wesens willen/das du mich verlassen hast / der
Herz wirdt dir die Sterbendrüße anhencken / biß das er dich
vertilcke ic. Der Herz wirt dich schlagen mit Geschwulst/ Sies
ber/ Hiz/ Brunst/ Dirre/ giftiger lufft/ vnd mit Gelsucht/ vñ
wirdt dich veruolgen/ biß das er dich vmbbringe. Vnnnd bald
hernach/ Der Herz wirt dich schlagen mit Drißen Egypti/mit
Seygwargen/mit Grind vnnnd Krez/ das du nicht kanst hayl
werden.

**Folgen ferner auß Gottes wort ernst-
liche tröwungen vom Krieg
vnnnd Unfrid.**

Ich will euch vnder die Hayden ströwen / vnd das schwert
aufziehen hinder euch her/das ewer land soll wüst sein/ vnnnd
ewere Stett verstorret/ vnnnd denen die von euch überbleiben/
will ich ain Seyghertz machen in jrer feind land/das sy sol ain
rauschend blat jagen/ vnnnd sollen fliehen daruor/ als jaget sy
ain schwert/vnd fallen da sy niemandt jaget.

Deuteronomij am xxviii.

Der Herz wirdt ain volck über dich schicken von ferne/ von
der welt ende / wie ain Adler fleügt/des sprach du nicht vers
stehst/ Ain frech volck/ das nit ansicht die person des Alten/
noch schonet der Jünglingen / vnd wirt verzeeren die frucht
deines Vihes/vnd die frucht deines Landes/ biß du vertilcket
werdest.

Esaie am j. Capitel.

Wolt jr mir gehorchen / so solt jr des lands güt genießten/
wegert jr euch aber/vnd seyt vngehorsam/ so solt jr von dem
schwerdt gefressen werden/dan der mund des Herzen sagt es.

Esaie am iij. spricht der Herz.

Darumb das die Töchter Zion stolz seind/ vñ gehn mit auf
gerichtem halß/ mit geschmuckten angesichten / treten ein

her vnd schwenzen / vnd haben köstliche schüch an iren füß
sen / So wirt der Herz den Schaytel der Töchter Zion kal ma-
chen / vnd der Herz wirt ir schönes har außrauffen / Zu der zeit
wirdt der Herz den schmuck an den köstlichen Schühen weck
nemen / vnd die Hefte / die Spangen / die Kettelin / die Arms
spangen / die Hauben / die Glittern / die Gebreimb / die Schnür-
lin / die Bisemöpffel / die Orenspangen / die Ring / die Stirn-
spangen / die Seyrklaiden / die Mäntel / die Schlayer / die Bey-
tel / die Spiegel / die Goller / die Porten / die Kittel / vnd wirdt
Stanck für gut Geruch sein / vnd ain Loß band für ain Gür-
tel / vnd ain Glaz für ain krauß Haar / vnd für ainen weyten
Mantel ain enger sack / Solches alles an statt deiner schöne /
dein Böfel wirt durchs Schwerdt fallen / vnd deine Krieger
im streyt / vnd ire Thor werden trauren vnd klagen / vnd sy
wirt jämmerlich sitzen auff der erden / das sibem Weiber werden
zu der zeyt ainen Man ergreyffen / vnd sprechen / Wir wollen
vns selbst erneeren / vnd klaiden / laß vns nu nach deinem na-
men haissen / das vnser schmach von vns genömen werde.

Deuteronomij am xxxij.

Ich will alles vnglück über sy hauffen / Ich will alle meine
pfeyl inn sy schiessen / vor hunger sollen sy verschmachten vnd
verzeeret werden / vom Sieber vnd vom gehen Tod / Ich will
der Thier zäne vnter sy schicken / vnd Schlangen giffe / Auß-
wendig wirt sy das Schwert berauben / vnd innwendig das
schrecken / Baide Jüngling vñ Junckfrawen / die Seügling
mit dem grawen Man.

Job am xix. Capitel.

Das Schwerdt ist der zoren über die missethat / auff das je
wisset / das ain gericht sey.

Volgen andere gemaine
tröwungen.

Hieremie am ix. Capitel.

Ich will diß volck mit Vermüt speysen/ vnnnd mit Gallen
trencken/ Ich will sy vnder die Hayden zerströwen/ welliche
weder sy noch ire vätter kennen/ vnd will das schwerdt hin-
der sy schicken/ biß das es auß mit jnen sey.

Jeremie am xi. Capitel.

Sihe ich will sy hainsüchen/ ire ainige Manschafft sollen
mit dem schwerdt getödtet werden/ vnd ire Süne vnd Töch-
ter hungers sterben/ das nichts von jnen überbleibe.

Im xv. Capitel.

Ich bin des erbarmens müde/ Ich will sy mitt der Wurff-
schaufel zü land hinauß werffen/ vnd will mein volck/ so von
seinem wesen sich nit bekeren will/ zü eytel Wayssen machen/
vnd umbbringen/ Es sollen nicht mehr Wittiben vnder jnen
werden/ dann des sandes am Meer ist.

Ezechiel am v. Capitel.

Darumb weil jr grössere bosheit thüt/ dann die Hayden/ so
vmb euch her seind/ vnd nach meinen gebotten nit lebet/ vnd
nach meinen Rechten nit thüt/ sonder nach der Hayden weysß
thüt/ die vmb euch her seind/ So spricht der Herz Herz also/
Sihe/ Ich will auch an dich/ vnd will Recht über dich gehn
lassen/ das die Hayden zusehen sollen/ vnnnd will also mitt dir
vmbgehn/ als ich nye gethon/ vñ hinfort nit thun werde/ vmb
aller deiner greuel willen/ das in dir die vätter ire Kinder/ vnd
die Kinder ire vätter fressen sollen/ vnd will solch Recht über
dich gehn lassen/ das alle deine übrigen sollen in alle wind zer-
ströwet werden/ Darumb so war als ich lebe/ spricht der Herz
Herz/ Weyl du mein Hailigthumb mitt deinen greueln vnnnd
Götzen verunrainiget hast/ will ich dich auch weck schaben/
vnd mein ang soll dein nicht schonen/ noch übersehen/ Es soll
das dritte thail von dir an der Pestilenz sterben/ vnnnd durch
hunger umbkömen/ vnd das ander dritt thail durchs schwerdt
fallen/ rings vmb dich her/ vnd das letzte dritte thail will ich
inn alle wind zerströwen/ vnnnd das schwerdt hinder jnen her
aufziehen/ Liß ferner das ganz Capitel/ dann es ferner ernste

lich tröwet/ vnd volgendes das sechste/ sibend/ vnnnd acht vnd
dreissigst Capitel/ Vnd des Propheten Hosee das sibendt vnd
acht Capitel. Item des Propheten Amos sibendt vnnnd acht
Capitel/ welche allzumal sehr schrockenlich tröwen/ Der All-
mächtig ewig Gott vnd vatter vnfers Herren vnd Haylands
Jesu Christi/ wolle durch seinen hailigen Gaist/ vnser her-
zen dermassen rhüren vnnnd anzünden / das wir solliches sein
wort/ hoch/ lieb vnd werd/ ja für den höchsten schatz halten/
demselben vestigklich glauben/ vnd zü gehorchen vns ernst-
lich besleyssen/ das wir vnns alsdann (wie die Epistel an die
Hebreer am dreyzehenden Capitel sagt) ain kostlicher trost/
nämlich/ so wir ain gut gewissen hetten / vnd fleissigten vns
gütem wandel zufüren bey allen / Gott des Fridens / der von
den todten außgefüret hatt / den grossen Hyrten der Schafe/
durch das blüt des ewigen Testaments/ vnnsern Herren

Jesum Christum/ Der mache vns geschickt inn als

lem gütem werck/ zuthün seinen willen/ vnd

schaffe inn vns/ was vor jm gefellig ist/

durch Jesum Christ/ wellichem

sey Ehre von ewigkait

zü ewigkait /

Amen.

In Sum wilt glück auff Erden han/
In allen dem/das du hebst an.
Wilt han ain gsund vnd fruchtbar Land/
Vnd alles was du darffst zur hand.
Wilt Friden han vnd gut gemach/
Nit Kranckhait oder ander plag.
Wilt deinen feinden sigen ob/
Das du dich mögest fröwen drob.
Wilt frum Fürsten vnd Heüpter habn/
Gefegnet sein mit allen gabn.
So müst du Gott vor augen han/
In Gotsforcht alles heben an.
Dann dises ist allain der Man/
Der glück vnd segen geben kan.
Sonn/Mon/vnd Steren helffen nicht/
Wa Gottes forcht vnd lieb gebricht.
Wa aber dises klainet ist/
Gewiß demselben nichts gebrist.
Da ist Gotts gunst vnd reiche gnad/
Wer dise hat der selb wol bstat.

Gott die Ehre in ewigkait/
A M E N.

Getruckt zu Augspurg/durch
Philipp Olhart.